



partii naleraq

UKA 2016/104-01

20-10-2016

**Raajat qalipaata atorlugit kitin/kitosanimik rejemelinillu nunatta iluani nunattalu avataanut tunisassiorsinnaasumik pisortanit namminersortunillu pigineqataaffiusumik tunisassiorfimmik, imminut akilersinnaasumik pilersitsisoqarsinnaanersoq paasiniallugu, Naalakkersuisut Ukiakkut Ataatsimiinnermi 2017-mi agguassassamik nalunaarusiornissaannik peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Peter Olsen, Inuit Ataqtigiit)

Raajat qalipaata atorlugit kitin/kitosanimik rejemelinillu nunatta iluani nunattalu avataanut tunisassiorsinnaasumik pisortanit namminersortunillu pigineqataaffiusumik tunisassiorfimmik, imminut akilersinnaasumik pilersitsisoqarsinnaanersoq paasiniallugu, Naalakkersuisut Ukiakkut Ataatsimiinnermi 2017-mi agguassassamik nalunaarusiornissaannik peqquneqarnissaannik Inatsisartut aalajangiiffigisassaattut inatsisartunut ilaasortaq Peter Olsen-ip Inuit Ataqtigiinneersup siunnersuuta Partii Naleraq sinnerlugut imannak oqaaseqarfigissuarput:

Partii Naleqqami pingaarteqaarput nunatsinni pisuussutit suulluunniit atorluarneqarnissaat inuiaqatigiinnilu iluaqtigineqarnissaat anguniarlugu suleqataassalluta.

Nassuerutigalugu oqaatigisariaqarparput, ullumikkut ukiunilumi qaangiuttuni arlalissuarni tunisassiornikkut atorluaannginnerujussuatta kingunerisaanik ilaatigut imartartsinnut nunamilu mingutsitsinerit pilersittaratsigit.

Tamanna allanngortilluinnartariaqaripput isumaqarpugut.

Aamma isumaqarpugut suliffeqarfissuaatitsinnut Royal Greenland-imut naalakkersuinikkut piunasaqaateqanngippallaartugut.

Siunnersuuteqartormi ilumoorluinnarpoq, soorlu assersuutigalugu Island-imi aalisakkanik tunisassiornermi tunisassiap 100 procentia tikingajalluinnarlugu tunisassiarineqartarpoq, massa maani saarullippassuit niaqui erlaviilu eqqaannarneqartut.

Ila nunarput pisuujuumassaaq taamatut ingerlaannassangutta, imaluunniit ilisimasakippallaarlutalu piuumassusikippallaarlutalu niuernerluppallaarpugut ?

Isumaqarpugut kingulleq akueralugu nassuerutigisariaqaripput.

Taamaattumik nunatsinni pisuussutitta uumaatsuuppata uumassuseqarpataluunniit tamakkiinerusumik atorluarneqarnissaat pimoorunnerusariaqaripput isumaqarpugut.

Taamaammallu inatsisartunut ilaasortap Peter Olsen-ip Inuit Ataqatigiinneersup siunnersuutaa taperserparput aamma siunnersuummi eqqartorneqartut siornatigulli misissuiffiqineqareersimammata.

Soorlu siunnersuuteqartup oqaatigingaa, misissuisimanerit maanna nutaajujunnaarsimammata nalilersueqqinnissaq pisariaqassasoq, tassami pissutsit allanngorartaannarput, taamaammatt taamanikkut misissuisimanermut naleqqiullugu ullumikkut periarfissat atugassarititaasullu qanoq ittuunersut paasisaqarfigissallugit soqutiginarput.

Kisianni soorlu aamma Naalakkersuisut akissuteqarnerminni oqaatilingaat Ilulissani Royal Greenland rejet qalipaasa sequtserlugit tunisassiarinerat ukiorpaalussuarni ingerlatereerpaat, qularnanngitsumillu misilittagaqarfigilluarlugu.

Taamaakkaluartoq ukiualuit matuma siorna raajat qalipaannik suliarinnittarfiup ilaa ikuallannikkuvoq, maannamut paasilluarsimannilarput, ilumut raajat qalipaannik tunisassiorneq suli ingerlanersoq, tassami ikuallattoorneq pissutigalugu, tunisassiorneq unikkallarnikummat.

Kisianni neriuppugut Ilulissani raajat qalipaannik tunisassiorneq aallarteqqinneqareersimassasoq.

Naggataatigut Naalakkersuisunut apeqqutigeqqissuarput, nunatsinniik rubin-it ukiorpassuarni Qeqertarsuatsiaat eqqaaniit annissorneqarsimasut, nalilersorneqarnissaat nunatsinnullu iluaqutissanngorlugit utertinneqarnissaat qaqugu pisinnaanersoq naatsorsuutigineqarsinnaanersoq ?

Taama naatsumik oqaaseqarluta siunnersuut tunngaviatigut taperserlugu inuussutissarsiornermut ataatsimiititaliami suliarineqarnissaa inassutingaarput.